

Adattar la lescha da scola

Duas incumbensas parlamentaras pretendan adattaziuns tar la lescha da scola

■ **(anr/ac) Gist duas incumbensas parlamentaras inoltradas a chaschun da la sessiun dal december dal cussegl grond pretendan d'adattar la lescha da scola parzialmain revedida l'onn 2012.** Il deputà *Bruno Claus*

(pld Cuir) giavischa da puspè installar las classes d'introducziun ed il deputà *Gian Michael* (pbd Schons) pretenda dad adattar las prescripziuns pertutgant la scola speziala. Quatter onns èn sparids dapi che la lescha da scola, revedida dal cussegl grond, è ida en vigur. Cuntinuadamain procura la lescha revedida dentant per discussiuns en il cussegl grond. E quellas discussiuns cuntinuechan. A chaschun da la sessiun dal december han gist dus deputads inoltrà incumbensas che pretendan adattaziuns tar la lescha da scola. Gian Michael pretenda che l'instrucziun da la promoziun preventiva da la scola speziala vegnia surdada cumplainamain a la cumpetenza dals purtaders da la scola. Tenor sias explicaziuns stipuladas en l'incumbensa fa il deputà valair che la lescha da scola saja formulada uschia ch'ils purtaders da las scolas sajan incaricads en emprima lingia da porscher l'instrucziun da la scola speziala. Quai succedia ozendi en furma integrativa, ina furma che vegnia era promovida e pretendida da las instanzas da scola chantunales. La furma integrativa da la scola speziala saja dentant fitg dispitaivla, scriva Gian Michael. Ella funcziunia sulet sche las circumstanzas sajan optimalas e coordinadas sco la grondezza da la classa cun partiziuns da pliras

classas, la collavuraziun tranter las persunas d'instrucziun ed il dumber da scolars che basegnian la promoziun speziala. Sche la furma integrativa saja la finfinala meglra saja dispitaivel, pretenda il deputà e scriva che la suletta enconuschientscha segira da la furma integrativa da la scola speziala saja l'explosiun dals custs ch'ella haja provocà a la maiorità dals purtaders da la scolas, vul dir las vischnancas. Per quel intent pretenda Gian Michel en sia incumbensa da stritgar ils paragrafs 2 e 3 da l'artitgel 46 da la lescha da scola ed era l'ordinaziun latiers. El pretenda che las furmas da la promoziun da la scola speziala sajan d'applicar egualmain tranter integrativ, parzialmain integrativ u separativ. En quella moda pretendan Gian Michel e ses cunsegnader dad adattar l'artitgel 46 paragraf 1 da la lescha da scola. L'instrucziun preventiva da la scola speziala saja, tenor Gian Michael, da surdar cumplainamain a la cumpetenza dals purtaders da la scola ed uschia saja l'ordinaziun tar l'artitgel 46 da la lescha da scola dad abolir.

Puspè turnar tar la classa d'introducziun

Cun ina outra furma da la promoziun integrativa da scolaras e scolars sa fatschenta l'incumbensa da Bruno Claus (pld Cuir). El e ses cunsegnaders pretendan da la regenza da reintrodur la classa d'introducziun. Ina classa che sa chattava tranter la scolina e la scola e serveva a scolaras e scolars che n'eran anc betg pronts per la scola. La classa introductiva interme-

diava la materia da scola da l'emprima classa entaifer dus onns per pussibilitar a scolaras e scolars da pudair midar senza problems en la segunda classa. Sco quai che Bruno Claus scriva en sia incumbensa retschaiavian quels scolars dapli temp per s'endisar vi da la materia da scola ed els retschaiavian era dapli sustegn da las persunas d'instrucziun. Il deputà è persuadi che quella classa d'introducziun possia impedir blers «cas problematic» e reducir ils custs per ina instrucziun supplementara pli tard. Bruno Claus ha fatg attent che la classa supplementara saja daventada ina unfrenda dal svilup da la scola che sa basia sin la promoziun integrativa ed uschia saja la classa d'introducziun svanida or da la lescha da scola chantunala. Dal tuttatafeg dad ina furma integrativa da sia classa d'introducziun na vul il deputà tuttina betg desister. El ha fatg attent en sia incumbensa che gist scolas pli pitschnas possian porscher la classa d'introducziun a moda integrativa. Quai mussian exempels en auters chantuns che porschian classas d'introducziun separadas u integradas en las ulteriuras classas. Integrativ en quel senn che scolaras e scolars retschaiavian sulet en ils roms tudestg e matematica instrucziun introductiva e vegnian integrads en ils ulteriurs roms en la classa ordinaria. I fa in pau la parita che las incumbensas Claus e Michael sajan cuntradictoras, almain pertutgant l'instrucziun integrativa. En scadin cas han ils dus deputads sutscrit las duas incumbensas viceversa.



Tant il deputà Bruno Claus sco il deputà Gian Michael han inoltrà incumbensas parlamentaras che pertutgan la scola populara.